

«Ina fasa da grond'intschertezza ha cumenzà»

Reacziuns da politichers grischuns a l'elecziun da Trump

DA FLURIN ANDRY / ANR

■ In terratrembel politic numnan ils mezs da massa l'elecziun dal republican Donald Trump. L'um da 70 onns che n'ha mai gi in uffizi politic vegn ad esser il 45avel president da l'USA. Ils 20 da schaner 2017 vegn il miliardari Donald Trump a prender domicil en la Chasa alva. El vegn a pudair manar ils Stadis Unids da l'America cun il sustegn dals republicans che han mantegnì la maioritad tant en il senat sco er en la chombra dals represchentants americana. La tema d'ina victoria da Trump che ha fatg il cumbat electoral da maniera populista è stada gronda, er en Europa. Tge din politicheras e politichers grischuns da l'elecziun da Donald Trump? Per cusseglier dals chantuns e president da la pcd grischuna Stefan Engler è questa tscherna «in mussament ch'igl è in privilegi da pudair viver en ina democrazia cun dapliras partidas che mo duas».

«I s'ha avrì in foss tras tut ils Stadis Unids»

I saja in gudogn d'avair bleras partidas politicas, ha ditg Engler, «mo uschia èsi pussaivel da tegnair ensemen las duas alas ed evitar quel effect da separaziun sco uss en America.» Ins na sappia anc betg tge che l'elecziun da Trump signifitga per la relaziun tranter l'USA e l'Europa, «fin uss han ins l'impressiun che l'America vegnia a sa concentrar sin ses agens projects e problems, tenor il motto 'emprim l'America e pir suentar il rest dal mund'. Sche quai fiss il cas gress la solidaritad dals Stadis Unids cun il mund a perder.» Engler ha menziunà l'entira campagna electorala: «Quella era dad in niveau ch'ins n'avess betg savì imaginar ch'el sappia esser uschè bass.» Areguard las consequenzas economicas per l'Europa e per la Svizra dependa uss, sco ch'el ha cuntinuà, quant protecciunissim ch'i vegnia fabritgà si



Politichers grischuns s'expriman davart las elecziuns dal president da l'America: da san. Martin Candinas, Stefan Engler, Jon Domenic Parolini e Silva Semadeni.

FOTOS MAD

en l'USA. Engler suppona ch'i vegnian messas limitas a la fiera libra. «Quai è però tut dumondas ch'ins na po oz anc betg responder.» Era la cussegliera naziunala Silva Semadeni da la ps ha ditg ch'i saja fitg difficil a predir tge ch'i capitia uss cun ils Stadis Unids.

«Sche mintgin guarda be per sasez»

Ella interpreteschia l'elecziun da Trump sco in svilup ch'ins observia actualmain er en blers auters stadis, ha manegià Semadeni, «en il Tessin p. ex. ha gudagnà in'iniziativa che ha num 'prima i nostri', ed ussa para ch'er ils Americans dian quai, 'emprim nus, America first'.» Tenor l'istorichera è quai in svilup privlus, «sche mintgin guarda per sasez na maina quai betg ad in bun tapin.» Da quels moviments datti tenor la cussegliera naziunala er en Ungaria, Frantscha ed auters pajais. Ella ha menziunà las epocas che singuls pajais mettevàn lur interess sur ils interess cuminaivels e ditg che quai haja adina purtà la guerra. «Ussa dependi da l'influenza che Trump vegn

ad avair sin la politica, er el vegn a stuaier guardar tge ch'il parlament di», declera Semadeni, «per nus signifitga l'elecziun da Donald Trump intscherchezza. Quai vala era per l'economia en tut l'Europa.» Cusseglier guvernativ Jon Domenic Parolini che maina il departament d'economia publica e fatgs socials tema er ch'els Stadis Unids da l'America cun Trump a la testa guardian sco emprim per els.

«Speranza na rinforza l'elecziun betg il squitsch sin il franc»

El speria che Trump demussia sco president dapli sentiment da reponsabladad che durant la campagna electorala: Diversas da sias esternaziuns ch'el ha fatg eran a l'avis da Parolini inacceptablas. «Sch'els Stadis Unids da l'America cun Trump al timun vegnan propi ad agir tenor il motto 'America first' po quai avair consequenzas era per las cunvegns da dazi liber cun l'Europa ch'ins è londervi a tractar», ha ditg il cusseglier guvernativ, «sche quai ha in-

fluenzas era per l'economia d'export svizra è anc intschert.» Durant il cumbat electoral avevan ditg pliras firmas en il Silicon Valley ch'ellas bandunian l'USA sche Trump vegnia elegì. «Ellas èn bainvissas en Svizra ed en Grischun nua che nus pudessan porscher situaziuns politicas stabilas ed uschia bunas premissas per stabilir qua novs sezs principals da questas firmas», ha manegià Parolini. Tge che l'elecziun da Trump signifitga per il turissem grischun nun è tenor el anc enconuscent: «Emprimas reacziuns èn che anc daplirs fugian dal dollar e cumprivan francs svizzers, quai è in dischavantatg per noss'economia d'export inclusivamain il turissem. La Svizra vala baingea sco pajais stabil, segir e tut ils auters predicats, è però memia chara.»

«Cuntent cun il sistem politic svizzer»

Era cusseglier naziunal Martin Candinas da la pcd è stà fitg surprais ch'els Americans han elegì Trump, «ina per-

suna che ha ideas ch'èn ord vista svizra totalmain daspera, per dir uschia.» Tge ch'els Svizzers sappian emprendre da quest'elecziun saja ch'els possian esser pli che cuntents e loschs cun il sistem politic svizzer, ha el cuntinuà: «Noss sistem cun il cussegl federal che consista da dapliras personas che vegnan elegidas dal parlament e betg dal pievel na pussibilitescha betg da concentrar uschè ferm la pussanza sin ina persuna sco che quai è il cas en ils Stadis Unids da l'America.» Candinas è propi surprais che la maioritad dals Americans saja stada pronta d'eleger ina persuna cun posiziuns talmain extremas. Quai è tenor el in mussament ch'els Stadis Unids hajan en quai che pertutgia la confidenza en lur politica «in problem cardinal» da schliar: «La tscherna dal nov president mussa che blers Americans han in grond problem cun il stadi sco tal ed han perquai speranza en ina persuna cun in pensar talmain extrem sco Donald Trump», ha manegià Candinas.